

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te ere ra râ te hoê o outou i te ite, e ani oia i te Atua ra, o tei horoa hua mai i te maitai i te taata atoa ra ma te patoi ore; e e horoahia mai ta'na.” Iakobo 1: 5.

Nu. 6.

10 Mati, 1912.

Mat. 5.

No Roto Mai i te Pouri, e Tae Atu
Ai i te Maramarama.

[PAPAIIHIA teie nei faatiaraa parau poto, no to'u faa-
riroraa ei “Moromona”, peneia'e e riro te reira ei fau-
faa no te tahi mau taata tei taio i teie nei parau.

Hou vau i amui mai ai i te Ekalesia a Iesu Mesia i te Feia Mo'a i te Mau Mahana Hopea Nei, e melo vau no te Ekalesia i Faaapîhia, oia hoi te Ekalesia parauhia “Sanito”, e ua mau vau i te toroa Orometua i taua haapaoraa ra e ono matahiti te maoro, e ia tae atu hoi i te tau i amui mai au i te Ekalesia mau. I te mau taime ua tupu te hoê ravea ia patoi atu i te “Moromona”, ua na reira atura vau mai te mauruuru rahi, ua rave au i taua ohipa patoiraa na roto i te paraparauraa utuafare e na roto i te a'oraa atoa hoi.

E tae a'era i te hoê mahana ua haere maira te hoê Orometua “Moromona” i to'u utuafare, e orometua poro-haere oia i te Evanelia i te vahi parahihia e maua, e ua vaiiho oia i te hoê maa parau iti evanelia, o tei fariihia e ta'u vahine, aore au i te fare nei. Ua ani atu ta'u vahine ia'na ia haere mai i te hoê pô, ia farerei au ia'na, e ia paraparau matou i te Evanelia, e ua faatia taua orometua ra. Ia ite au i te

ohipa i oti i ta'u hoa, ua mauruuru roa vau, no te mea, ua mana'o ihora vau e, e ravea mau teie ia faaite atu i taua orometua "Moromona" ra e, e tiaraa hape roa to'na, e aore roa e mana to te ekalesia i Utaha ra. Ua haapii-roa-hia vau i te tiaraa o te haapaoraa "Sanito", e ua oti ia'u i te taio i te mau pariraa i te Ekalesia, parauhia "Moromona", ua taio atoa vau i te mau buka i papaihia ei patoiraa ia ratou ra, e no reira ua ineine roa vau i te farerei i taua Orometua "Moromona" ra.

I te taime i haapaohia ia haere mai taua orometua ra, ei reira ua tae mai oia ra, e ua paraparau matou e tae noa'tu i tuiiraa pô, ei reira faaea ihora matou, haere atura taua taata ra ma te parau e, e haere faahou mai oia ra. Te parau i parauhia'i i taua pô ra, o te parau ia e, "Tei te Ekalesia i Utaha anei te Autahu'araa Mo'a ra?"

I te mahana i faataahia ra, ua haere faahou maira taua orometua ra, e ua parau faahou matou i te parau i parauhia'i i te farereiraa matamua, oia hoi, "Tei te Ekalesia i Utaha anei te Autahu'araa Mo'a ra?" Ua faahope roa matou i taua tufaa parau ra, i te mau tufaa rarahi e te mau tufaa rii atoa hoi. Ia reva'tu taua orometua i taua pô ra, ua vaiiho mai oia i na buka rii, oia hoi, "Te Monoraa", e te tahi atu â buka, oia hoi, "Te Autahu'araa e te Peresideniraa", i papaihia e te Aposetolo ra, o Tihare Penerose.

Ia reva'tu oia, ua haamata ta'u vahine i te feruri e, e riro paha e, tei te "Moromona" te parau mau. Ua faaara vau ia'na na roto i te parau i papaihia, o tei na ô maira e, "Eiaha outou e turori noa'tu i te mau parau rii êê", mau maite râ i te mau mea maitatai i iteahia ra. Ua taio vau i na buka i vaiihohia ia maua, oia hoi, "Te Monoraa" e "Te Autahu'araa e te Peresideniraa", e ua taio faahou, e ua taio faahou â mai te ani atu i te Atua ia haamaramarama mai ia'u. Na roto i te taioaraa i taua na buka ra, ua tupu to'u maere i te mea e, ua rahi te mau vahi hape no te Ekalesia i Faaapîhia i ta te haapiiraa a Iosepha (metua). Ua ite atoa

vau i te mau vahi au ore e rave rahi, i te Buka Fafau a te Sanito, o tei patoi i te haapiiraa a Iosepha (metua). Ua tupu te mana'o ia'u e, Oia mau anei, e mau tavini mau anei teie na te Fatu, teie nei mau Orometua "Moromona" ta'u i hamani ino, e ta'u i pari-haavare, e ta'u i faahopo, eaha ia vau? Na roto i to'u ite i te Evanelia, ua ite au e, e mea faufaa hau e i te Ora Mure Ore. Ua peapea roa vau i te faarue i to'u mau fetii e i to'u mau hoa i te faaroo ra. Tera râ, ua tupu ia'u e, tei te Ekalesia "Moromona" te Autatahu'araa Mo'a e ua iteahia taua Ekalesia ra e te Fatu.

No to'u mau peapea i mana'o ai au e, e papai atu vau i te hoê o te mau taata toroa rahi no matou, mai te faaite atu ia'na i to'u huru, e i to'u mau peapea mana'o, e ua na reira atura vau mai te mana'o e riro oia i te tauturu mai. E maere rahi to'u i te taeraa mai ia'u te pahonoraa i ta'u leta; ua na ô maira taua taata toroa rahi ra e, "Eiaha roa oe e farii i taua mau Orometua "Moromona" i to utuafare na, ia haere mai ratou ra, a opani taue i te opani i to ratou mata." Ua pahono atu vau ma te parau e, eita e nehenehe ia'u i te rave i te huru ohipa mai ta'na i haapii mai, oia hoi opani taue i te opani i to ratou mata. Ua pahono faahou maira oia, mai te parau e, "E ohipa atâ hoi ta'u i haapii atu ia oe na i te rave, aita'tu râ e ravea ia roaa mai i te mana'o hau ia oe na." Te haamaitai nei au i te Atua i te mea, aore au i na reira i te mau tavini a te Fatu.

E iva avae to'u imiraa i te tiaraa o na ekalesia e piti, e no te hamani ino o to'u mau hoa i te pae faaroo, ua tapitapi roa vau i te hoê mau taime, e te feruri noa ra to'u mana'o e, "Eiaha e faatia ia haamana'o faahou i te "Moromona", e tapea maite râ i te Sanito. I teie nei râ mau huru mau'a'o i faahemohia mai ai au. Ua pure au mai te feaa ore i te Atua, ia haapapuhia to'u haerea, e i te hoê pô, na te Atua i haapapu i to'u mana'o na roto i te hoê moemoea. Teie te huru o te moemoea ta'u i ite: Ua fatata matou i te haamata'i i te pureraa Sabati Oroa e ua i te fare pure i te taata. Ua parahi au i pihaiho i te terono i te hoê vahi i faateiteihia, no te mea o vau te tia no taua amaa ra. Ua himene matou, e ua pure, e ua himene faahou, e ua faaotihia te mau ohipa o te oroa o tei matarohia i te rave, ei reira ua faataahia taua pureraa ei pureraa iritiraa mana'o. Aita roa e ma-

niania, aore roa te hoê peapea, tia a'era te hoê taeae i te faaroo, e taata maitai oia e te herehia, e ua haamata oia i te parau i te parau êê. Ua mauruuru roa te mau taata i te faarooraa i taua horoaraa ra. A parau ai oia ra, ua faaroo vau i te hoê re'o papu roa i te na ô mai e: "E ere te reira te horoaraa mau; eita oe e ite i te horoaraa mau i ô nei." Ei reira ua ara vau, e ua faatia'tu vau i ta'u vahine i te mau mea ta'u i ite, e ta'u i faaroo, ei reira ihora, ua pure haamaitai maua i te Atua no to'na faaaratairaa mai ia maua i to maua imiraa i te parau mau.

E ao a'era, e te ohipa ta'u i haamata na i te rave, o te papai atu ia i te feia toroa rarahi o te Ekalesia i Faaapîhia ma te haponu atu i to'u parau faatoroaraa. Ua haere mai te tahi o te feia toroa rarahi mai te titau i to'u mana'o. Ua parau mai nei te tahi pae e, aita to ratou e aroha ia'u, no te mea ua rave au i te ohipa ta'u i rave ra ma te mata ara te huru. Ua faaite atu vau ia ratou e, ua haamaitai atu vau i te Atua i te mea, ua faarahia na to'u mata.

E ono hebedoma i muri ihora, ua tomo maua to'u vahine i te Ekalesia mau a Iesu Mesia, e te ite nei maua mai ta maua i ite e te ora nei maua i teie nei, e ua fariihia e maua te tahi mau haamaitairaa i parauhia i te feia faaroo, e ia haapao maite â maua, e rahi atu â te mau mea maitatai e roaa mai ia maua. E rave rahi te mau hoa i moe ia maua no to maua faarneraa i te Ekalesia i Faaapîhia, tera râ, ua roaa mai ia maua te Poe Tao'a Rahi. Ua papu roa ia'u e, na te Perôpheta ra, na Iosepha Semita (metua) i horoa i te mau taviri o te Basileia i te mau Aposetolo hou oia i taparahi'i, e e vai noa taua mau taviri ra i te Ekalesia mau, e tae roa i te tau e haere mai Oia (Iesu), ei Arii e ei Faatere e 1000 matahiti a vai ai te Mileneamu. Te ite nei au e, o teie te basileia i parauhia e Daniela, ta te Atua o te ra'i i faatupu, aore teie basileia i pararî i te poheraa o te Perôpheta ra, o Iosepha, e e ore roa e mou e a muri noa'tu.

Ia faufaahia te mau taata'toa na roto i te taioraa i teie nei faatiaraa poto, o to'u ia pure. Amene.

Papaihia e to taeae i te Evanelia,

THOMAS ADAMS.

Iritihia ei re'o Tahiti no roto mai i te "Fetia Mileneamu" i neneihia i te fenua ra, i Beritani.

Te Parau Tuatapapa no
Iosepha Semita.

(TUATIRAA.)

PENE XVIII.

MATAHITI 1833-1834.

E aroraa apî no te tama'i tahito. Ua tiamâ roa te enemi ia hamani ino i te Feia Mo'a. Tiahiraa ri'ari'a rahi. Te mau aniraa'tu o te Feia Mo'a i te tavana rahi, ia Dunklin, e i te peresideni no te hau Amerika, ia Jackson. Ua haapao te Feia Mo'a e te enemi i te hoê amuiraa.

[MUA roa i to tatou fanauraa mai i roto i teie nei ao, e i mua i te hamani-raa-hia o te taata nei, ua tupu te hoê tama'i rahi, e te ri'ari'a hoi, i nia i te ra'i. Ua tama'i atura te Atua, to tatou Metua Mure Ore, i Ta'na ra tamaiti haapao ore roa, ia Satani, o tei hinaaro ia faarahihia to'na mana. Ua hau roa'tu te nuu o te Fatu i te puai, e no reira ua riro te rê ia ratou, e ua hurihia o Satani e ta'na ra mau melahi i raro roa i hade. Tei roto i te nuu o te Fatu e na huru taata e toru, oia hoi, te mau taata maitatai roa, e te mätä'u ore hoi; te mau taata mätä'u rii; e te tahi huru taata, o tei pee ê atu i te Fatu, no te mea ua hau oia i te puai, e aita roa'tu no to ratou aroha mau na'na. Ia fanau mai teie nei huru taata i roto i te ao nei, oia hoi te mau taata o tei ore i aroha i te Fatu, i riro ai ratou, ei mauhaa ohie roa na Satani; e ia faatia te Atua i Ta'na ra ohipa i nia iho i teie nei ao, ua rave Satani i taua mau taata nei, ei mau tauturu na'na i ta'na tamataraa puai roa i te haamou i te ohipa a te Atua.

Te aroraa rahi i Missouri, o te tahi aroraa apî ana'e ia te reira no taua tama'i tahito ra, e e rave rahi te mau mauhaa na Satani i reira, e ua hau roa ratou i te ino i te mau taata'toa. Ua tiahi-ê-hia'tu te Feia Mo'a i te mataeinaa ra,

ia Iaketoni, ei reira i te tahi vahi e te tahi, e tae noa'tu i to ratou mau-e-ê-raa'tu i Missouri, ia ore ia taparahihia ratou. Ia horoahia'tu te mau mauhaa tama'i na te Feia Mo'a, mai tei au i te faaueraa a te raatira, a Colonel Pitcher, ua riro te enemi mai te hoê nuu diabololo i te huru. Ua horo puai atu to ratou mau pūpū, na raro e na nia i te mau puaahorofenua i tera vahi e i tera vahi, i te eiāraa'tu i te mau tao'a a te Feia Mo'a, e i te haapararāraa'tu i to ratou ra mau fare. Ua haamāta'u atu ratou i te taparahi i te mau vahine e te mau tamarii, ruuruu atura i te mau taata i te mau raau, e ua tupai atu ia ratou. Ua itoitroa te mau orometua e rave rahi i te rave i teie nei ohipa hamani ino, e ua aratai te hoê orometua, o Isaata McCoy to'na i'oa, ma ta'na ra pūpuhi i nia iho i to'na ra taponono, i te hoê pūpū enemi.

Ua purara te mau Feia Mo'a, o tei mau-e-ê atu i te enemi, i roto i te medebara; i ori haere noa ratou na roto i te rui, e e ati rahi hoi to ratou i te toetoe, e te rohirohi, e te mihi rahi roa, e ua faataa-ê-hia to ratou mau utuafare, te tahi i te tahi, e ua moe roa. E poipoi a'era, i faaea'i te tahi pae i nia iho i te hiti o te anavai rahi, o Missouri, e i te mau mahana'toa, ua tae mai e toofanu Feia Mo'a i te amui atu ia ratou i reira. Ua haere atu te tahi pae i tera pae mai no te anavai i roto i te mau mataeinaa ra, ia Cale (Clay), e ia Vana Burena (Van Buren), e ia Lafaeete (Lafayette), e i roto i te tahi atu mau mataeinaa. Ua faaitohia mai e, aita to Iaketoni ana'e o tei hamani ino i te Feia Mo'a, no te mea ua tiahi-faahou-ê-hia ratou e hope roa'e, maori râ, to ratou o tei haere atu i roto i te mataeinaa, ia Cale; ua hi'o aroha mai râ to Cale i te Feia Mo'a, e ua faatia ratou i te Feia Mo'a ia parahi ratou i reira.

E hoê hebedoma i muri a'e i teie nei hamani-ino-raa ri'ari'a o te enemi, i mua'e i te aahiata o te mahana 13 no Novema, ua haamata te ra'i i te riro ei maramarama hana-hana rahi roa. Ua faarue te mau fetia i to ratou mau vahi

e te haere atura ratou na roto i te ra'i i te faaiteraa mai i te tahi maramarama nehenehe roa. Ua ite atu te Feia Mo'a i taua mea hanahana ra, e te oaoa atura ratou no te mea, ua mana'o ihora ratou e, o te hoê tapao ia te reira no to te Atua hanahana, e e parau mau roa ia. Ua ite atoa'tu te enemy i taua mea ra, e mai te Feia Mo'a, ua mana'o ihora ratou e, te faaite maira te Atua i To'na mana rahi, e ua mehameha roa ratou.

Ia tae atura te mau taeae i tera pae mai no te anavai, haponono atura ratou i te hoê parau i te faaiteraa'tu i te tavana rahi, ia Dunklin, i te mau mea iino, ta te enemy i rave ra, e ua faaue atura oia, ia haapaohia te hoê haavâraa, e ua ravehia te raatira, o Colonel Pitcher, no te mea ua rave oia i te mau mauhaa tama'i na te Feia Mo'a. Ua parau mai te tavana e, e faaho'i atu oia i te Feia Mo'a i to ratou mau fare, aita râ e tia ia'na ia paruru mai ia ratou, e no reira aita ratou i hinaaro i te reira, no te mea aita ta ratou e mau mauhaa tama'i, e aita ratou i hinaaro ia taparahihia e te enemy.

Ua haponono atura ratou i te mau aniraa i te peresideni no te hau Amerika, ia Anederea Iaketoni, ia faatia oia i te nuu no te hau i te mataeinaa ra, ia Iaketoni, ei paruru na ratou, aita râ oia i faatia, no te mea, ua parau maira oia e, aita tei ia'na te mana ia na reira'i. Te hinaaro ra te tavana no Missouri e te peresideni no te hau Amerika ia paruru mai i te Feia Mo'a mai tei au i te ture o te fenua, area râ, ua tamata noâ ratou na roto i te ture o te fenua ia paruruhia ratou, ua tiahi-ê-hia'tu e hoê tausani feia i to ratou ra mau fare.

E ati rahi roa to te Feia Mo'a i Missouri i taua tau toe-toe ra, no te mea ua riro to ratou mau mea mahanahana'toa, aita to ratou e mau tapoi maitatai, e aita i navai ta ratou maa. A na reira'i ratou i te parahi i roto i te ati, te haere atura te enemy i te haapararîraa'tu, e i te taauahiraa'tu i to ratou mau fare, e i te haamouraa'tu i ta ratou mau auhune.

I roto i te hoê hebedoma, i te matahiti 1834, ua haamouhia e hoê hanere, e pae ahuru fare i te auahi.

I te pae muri no te avae ra, o Febuare, ua haapaohia te hoê haavâraa i roto i te mataeinaa ra, ia Iaketoni, e ua parauhia na taeae e hoê ahuru, ei na ite i roto i te haavâraa. Ua haere atura te hoê pŭpŭ faehau no te hau Missouri, ei paruru na ratou, area râ ia tae atura ratou ia Inidipenideni, ua haaputuputuhia te hoê pŭpŭ rahi enemy, e ua ho'i oioi faahou atura te mau taeae i te mataeinaa ra, ia Cale, e aita roa ratou i tae i roto i taua haavâraa ra. Ua haavâhia te raatira, o Colonel Pitcher, no te mea, ua raveoia i te nuu no te hau ia faaore i te tahi orure hau, e ua ite papu roa oia e, aita e vai ra te hoê orure hau i reira, e no te mea ua rave oia i te mau mauhaa tama'i na te Feia Mo'a. E faaroo a'era te tavana rahi o Dunklin i te reira, faaue atura oia ia faaho'ihia'tu te mau mauhaa tama'i i te Feia Mo'a, aita roa râ ta'na ra faaueraa i haapaohia, e na te reira i faaite mai e, e taata paruparu roa oia. Ua tufahia te mau mauhaa tama'i i ropu i te enemy, e aita roa'tu i noaa i te Feia Mo'a.

I te mahana i muri a'e i te taeraa mai o te Nuu no Ziona i Missouri, i te mahana 5 no Tiunu, 1834, ua papai atu te mau taeae i te hoê leta i te tavana rahi, ia Dunklin, i te faaiteraa atu ia'na e, ua ineine te Feia Mo'a ia faaho'ihia i ta ratou mau fare, i te mataeinaa ra, ia Iaketoni, no te mea, i parau mai na oia ia ratou e, e faaho'i atu ai oia ia ratou i to ratou mau fare, eita râ oia e paruru ia ratou. Ua noaa i te Feia Mo'a te mau mauhaa tama'i apî, e ua tae mai te Nuu no Ziona ia tauturu mai ia ratou, e ua mana'o i hora ratou e, e tia ia ratou ia paruru ia ratou iho. Ua pahono mai te tavana ia ratou e, e mea tia roa te reira, ia faaho'i-faahou-hia'tu ratou i to ratou mau fare, e ia parahi ratou i nia iho i to ratou i hora mau fenua, aita râ oia i faaho'i atu ia ratou. Ua tamata oia i te tâparu ia ratou, ia faaau ratou i te hoê parau i te enemy.

Na roto i ta'na mau tamataraa, e i ta te tahi atu mau taata paari, ua haapaohia te hoê amuiraa e te Feia Mo'a e te enemy, i te 16 no Tiunu i te mataeinaa ra, ia Cale. Ua iritihia to ratou ra mau mana'o, aita râ te hoê mea i faatiahia. Te hinaaro ra te enemy ia hooi te mau fenua no te Feia Mo'a, mai te mea e faarue ratou i taua fenua ra, e eiaha roa'tu e ho'i faahou mai i reira. Area râ e mea tia ore roa te reira, no te mea, ua faauehia ratou e te Atua ia patu i te oire ra, ia Ziona, i reira, e aita roa ratou i faatia. Te hinaaro ra te Feia Mo'a ia hooi te mau fenua no te mau taata'toa, o tei ore i hinaaro ia parahi i te mataeinaa, i parahihia e te Feia Mo'a, aita roa râ te enemy i faatia i te reira. Ua tupu te peapea e te maniania i roto i te amuiraa, e ua faaotihia ia ma te patiaraa'tu o te tahi o te enemy i te tahi. E amuiraa faufaa rahi roa ia te reira, no te mea, aita noâ ratou i faaau i te hoê parau, ua faaitihia mai te ohipa mau no te tavana rahi. Ua i roa te reva i te maniania e te aroaro, e ua tapi-tapi te mau mana'o no te Feia Mo'a i te mea ta ratou e tia.

—OLE PETESONA.

(E tuatihia mai teie parau.)

“E te ravea haavare a te mea ino ra e! E te teoteo, e te hapa, e te maamaa o te taata nei e! Ia haapiihia ratou, ua mana'o ratou e, e feia paari ratou; e e ore ratou e faaroo i te a'o a te Atua, no te mea ua faarue ratou i te reira, i te mana'oraa e, ua ite ratou ihora, e no reira, e mea maamaa to ratou paari, e aore hoi a ratou e faufaa i te reira. E pohe hoi ratou.

“Atae hoi te feia tao'a e, te taata tao'a i te mau mea o teie nei ao. No ta ratou tao'a i vahavaha'i ratou i te taata veve ra, e ua hamani ino mai ratou i te taata mamahu, e te vai noa nei â to ratou aau i nia i ta ratou tao'a, i riro ai ta ratou tao'a ei Atua no ratou. E inaha, e pau ta ratou tao'a e ratou atoa hoi.” Buka a Moromona; II Nephi 9: 28, 30.

Te Mau Parau Api.

TE hamani nei te hoê sotaiete i te fenua ra, o Amerika i te hoê pahi rahi e 1000 avae i te roa.

I te 6 no Mati, ua reva'tu o Farani raua o Harati i te amuiraa Eperera, i Hao. Na nia i te pahi Papeete, te revaraa'tu.

I te oire ra o Chicago, i te fenua ra o Amerika, ua fanau maira te hoê aiû. E i te mahana i fanau ai taua aiû ra, e 4 o'na niho, e ua faitohia to'na teiaha, teie te rahi, 15 paunu.

I te avae ra o Tenuare i mairi a'enei, ua amuihia te hoê fetia apî i te reva Amerika, e teie te rahi o te mau fetia i roto i taua reva ra, e 47, no te mea ua faatiahia te hoê mataeinaa apî i roto i teie nei hau.

E toetoe rahi roa i te oire ra Niu Ioka, i te fenua ra, i Amerika. Ua tuuhia mai e rave rahi te mau fare pureraa ei taоторaa no te feia vêvê roa. E rave rahi atoa te feia ona o tei farii i te feia vêvê i to ratou mau fare, ei tamahanahana ia ratou.

Ua huna te hoê taata i ta'na moni parau i raro a'e i te tahua o to'na fare, e ua amuhia i te iore. Teie te rahi o te moni i pau, oia hoi, \$2,565.00. E ua haaputu taua taata ra i te huahua o taua moni parau na'na o tei toe mai ra, e ua afai atura i te fare moni o te hau, titau atura ia faaho'ihia ta'na moni i pau ra. E te mana'o nei oia e, e roaa mai ia'na te tahi pae o ta'na moni i pau.

I te oire ra, i Roto Miti, ua pohe roa te hoê tamaiti, 13 to'na matahiti. Teie te tumu i pohe ai taua tamaiti ra, oia hoi, ua tupu te hoê mata'i, e ua mairi i raro te hoê niuniu uira, e ua haere atura teie nei tamaiti, e ua fafa'tura, i taua taime ra, pohe roa'tura taua tamaiti ra. Ia riro teie ei faaaraararaa i te mau taata o tei parahi i Papeete nei. Ia mairi te hoê niuniu uira i raro, noa'tu te huru, eiaha roa te hoê taata e faatiaia noa'tu i to'na rima, a pohe oia.

Te tama'i noa ra te fenua Italia e te fenua Turekia, e ua tupu te hoê aroraa i tua i te Miti Uteute, e ua puta e ua paremo hoi na pahi manuâ o to Turekia e hitu. No te aroha o to Italia, ua faaorahia te hoê pahi. Ua fare-rei ratou i tua roa ei reira ua haamata i te tama'i. No te puai o te mau pupuhi a to Italia, aita'tura oia i haafatata i te mau pahi o to Turekia, ua faaatea roa râ to Italia e pae maile te atea, ei reira oia i pupuhi mai ai. E tai-me poto roa to ratou aroraa, e ua ama i te auahi, e ua paremo te mau pahi o to Turekia. No te nainai e te paruparu o te mau pupuhi a to Turekia, aore roa te hoê pahi o to Italia i ino, aore roa atoa te hoê taata Italia i pohe. Ua hanere râ te taata Turekia tei pohe roa.

Ua tomo roa te hoê pahi auahi no Rutia i roto i te Miti Ereere, e teie te rahi o te taata pohe, 172.

I te mahana fanauraa ua faaamuhia 30,000 taata vêvê i te maa i te oire Niu Ioka, i Amerika. Na te hoê ekalesia i faaamu i teie nei mau taata.

Ua hoohia'tu te pahi auahi, o Mariposa, e e ore oia e tae faahou mai i Papeete nei. Ua hoohia'tu oia, e teie te rahi o te moni, oia hoi, e 300,000,00 dara, moni Amerika.

Te tono atu nei te hau Amerika e 500 faehau i ô te fenua Tinito, ia paruruhia te mau taihaa a te mau taata Amerika, o tei parahi i reira. Ua na reira atura te tahi mau hau i te paruru i to ratou mau taata i parahi i roto i te mau hau êê.

Na te hoê cowboy, i Utah, i marei i te hoê liona oviri i parahi i te mau vahi mou'a, 10 avae te roa. E maha marei-raa-hia to'na. 1, Ua marei-hia i te a'i; 2, to'na ihu; 3, na avae i mua; 4, na avae i muri. E ua tuu-hia ihora i nia i te puaahorofenua, afaihia'tura i roto i te oire, e te hinaaro nei oia, ia hoohia'tu taua liona ra i te taata.

Ua hurihia e 60 afata avaota i roto i te miti i San Francisco. No Raratonga mai taua mau avaota ra, na nia hia mai i te pahi ra, ia Tahiti, i te faauta-raa-hia mai. Teie te tumu i hurihia'i, taua mau avaota ra, ua iteahia te hoê manu ino roa, e no reira ua faaue atura te hau Amerika ia hurihia taua mau afata avaota ra.

I te 3 no Mati, ua tupu te hoê vero i ô Borabora, e ua roohia te tahi na boti. Ua faaterehia te tahi mai Raiatea'tu i Borabora, ua hurihia taua boti i te aaui, e ua parari roa, aore te taata i pohe. Ua faatere-atoa-hia te tahi boti mai Borabora'tu i Maupiti, aita râ taua boti i ô i roto, ua vai noa râ i tua e 3 mahana, moe roa'tura taua boti ra. E toru taata tei nia iho i taua boti i moe ra.

I te 24 no Febuare, i te matahiti 1912, i te oire ra, i Papara, i Tahiti nei, ua tupu te hoê ati i te taata ra, ia Huri a Tuino. Mai teie te huru, ua rave oia i te hoê topita, e ua haere atura oia i nia i te aaui e pupuhi i te i'a, e i to'na taeraa i nia i te aaui, ua tutui oia i taua topita ra mai te hi'o i te i'a. E ua afai a'era te rima atau i taua topita ra i nia i pihaiho i te tari'a atau. I taua taime ihora, ua haruru ihora, ua huahua roa to'na rima o te iri ana'e ra te mauraa, e te tari'a atau ra, aita ia i itea-hia, mairi ihora oia i nia i te aaui. E ua puto maira te hoê taata i te vaa, e ua rave i teie nei taata, tuu ihora i roto i te vaa, e ua puto atura i uta, e tae atura i uta, ua tia a'era i nia, haere atura i te fare. Ei taua taime ihora, ua anihia maira te hoê pereoo machine, e ua tae i reira, e ua afaihia na teie nei taata na nia i teie nei pereoo, i te fare ma'i. E ua tapuhia te rima.

Ua tupu te hoê aueue fenua i te fenua ra i Ioman, e pae oire i pau i taua aueue fenua, e e 30 taata i pohe roa.

I te avae Ditema, i Mangareva, ua pohe te hoê peresibutero, o Kumea a Tagia. E taata tapea maite oia i te faaroo, e e poheraa maitai to'na.

Te ani nei te peresideni o te hau Amerika i te mau taata Amerika ia haponu atu i te maa i te fenua Tinito, ei tauturu i to taua fenua ra. E o'e iti rahi roa to taua fenua ra, e ua tausani te taata o tei pohe roa i te poia. No te orure hau i taua fenua ra, te tahi ia tumu i rahi te ati i reira.

I te avae ra o Febuare i mairi a'enei, ua tae mai te pahi ra, o Maitai, i Tahiti nei, e tei nia ia'na na orometua o te Ekalesia a Iesu Mesia i te Feia Mo'a i te Mau Mahana Hopea Nei. E teie to ratou mau i'oa: Harris Pond, Lewis Westover, Ira Hyer, e Ora Hyer. I maitihia mai ratou, ei poro i te Evanelia ma te haapii atu i te taata atoa o te mau fenua moana nei, ia roaa te ora i to ratou mau varua.

Rev. C. V. Richeson i te oire ra o Boston, te hoê orometua no te haa-paoraa Bapetizo, ua momoahia oia i te hoê tamahine, e no to'na hinaaro i te tahi vahine ê, ua rave oia i te raau taero e ua faainu atura i teie nei tamahine, e i taua taima ihora, ua pohe roa. E i te taima i pohe ai ra, ua afaihia'tura teie nei orometua i te haavâraa e ua haavâhia oia mai te fa'i atu e, na'na i faataero, e teie te utua i tuuhia mai, e haaparahihia oia i nia i te hoê iri parahiraa, e na te uira oia e haapohe.

I te oire ra o Logan, i te fenua ra i Amerika, ua haere na taata toomaha i uta i roto i te hoê peho, e ta ratou mau puaahorofenua e tapu i te raau, tei reira te hoê fare i hamanihia ei vairaa machine no te êêraa i te mau raau paina. E tau toetoe ta ratou i haere, e 4 avae te hohonu o te hiona, ua mairi maira te hiona no nia mai i te mau vahi teitei i nia ia ratou e ta ratou mau puua, moe roa'tura ratou i te hiona. I na hora i muri a'e, ua faaroo te mau taata, haere atura e heru i teie nei mau taata, ua iteahia na taata tootoru e ta ratou mau puaahorofenua e ua pohe roa. O te maha o te taata râ, ua vai noa oia i raro a'e i te hiona i roto i te hoê taheraa pape, 24 hora te maoro, e no te puai o te taheraa o te pape, ua roaa mai te hutiraa o te mata'i i roto ia'na, e ua iteahia a'era oia e te feia i heru, hopoi-hia'tura i roto i te fare, tamahanahana'tura ratou ia'na.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.